

Compositor y Musico Arubano Rufo Wever e pionero di musica y cultura Arubano

Dia 30 di December 2015 ta recorda 38 aña cu e gran compositor ya musico Arubano, Rufo Wever, a fayece.

Un dia prome cu aña bieu 1977 a dreña e tristo noticia cu e genio musical Rufo Wever a fayece di un longontstekking. Un delegacion a viaja di Corsow bou di guia di Gobernador di Antiyas, Drs. Ben Leito pa e entierro cu a tuma lugar dia 2 di januari 1978, bou e tononan di e Orchesta Arubano Simphonico.

E luna di December tabata uno hopi especial den bida di Rufo. El a nase ariba un 8 di December, el a fayece ariba 30 di December, tambe tabata un luna di December cu su talento musical a wordu descubri ora el a haya, en coneccion cu fiesta di Sinterklaas, un sonfonia di boca regalo. Tambe den e dianan di fiesta di fin di aña tabata dianan hopi special pasobra hopi musico tabata bin bishita Rufo na cas na Wilhelminastraat 33 y automaticamente cada un ta pasa man pa nan instrument preferi y tabata cuminsa toca.

Rufo su importancia den historia di musica Arubano por wordu poni den cinco categoria.

1. E calidad di Rufo su composicionnan ta di nivel hopi halto, esaki por scucha no solamente den su walsnan pero tambe den e variedad di diferente tipo di musica manera e mazurka, tumba y danza.

2. E cantidad di composicion, total un 400 di cual 100 ta composicionnan completo pa orkesta of tambe por wordu toca door di piano of guitarra of saxofon. Hopi artista y gruponan tipico y tambe orkestra a graba e composicionnan. Mayoria di Rufo su composicionnan ta instrumental.

3. Rufo tabata e prome musico contemporaneo conoci cu a compone y cu su composicionnan ainda ta wordu graba. E prome composicion di Rufo ta e immortal wals "Arubanita" cu a wordu compone na aña 1935, esaki ta un composicion di importancia historico pa Aruba. E aña aki (2015) e composicion a cumpli 80 aña y te ainda ta ser scucha frecuentemente den diferente version.

4. Rufo Wever tabata un musico completo. Esaki tabata encera e tabata toca diferente instrument manera saxofon, acordeon, piano, guitarra, cuarta y clarinet. Rufo tabata compositor. Rufo tabata arreglista, lesa y skirbi musica.

5. Ademas Rufo tabata e prome persona na Aruba cu a cuminsa traha e cilindernan pa e cahi orgel y el a hasi esaki pa 33 aña.

Aki ta sigui un minibiografia :

Dia 08 di December 1917, Rufo a nace na Wilhelminastraat 33, Oranjestad, Aruba, e primogenito di e matrimonio di Shon Leonila Maria Annette Lampe Babijn y Civiles Marcial Wever Everts.

E pareha tabata bin di famianan acomoda y Civiles tabata un contratista, constructor di edificionan, di barcanan y ebanista.

Don Civiles tabata tin un mente technico pero tambe tabata gusta musica y tabata toca clarinet y cuarta.

Net prome cu Rufo a cumpli 6 aña, Rufo a haya un sinfonia di boca regalo y den un par di dia el a sorprende su famia cu e por a toca un cantica cu tabata na moda su mes y sin ningun ayudo. Rufo su tata a keda masha impresionado y entusiasmo y mesora a compra un piano y a contrata e conocido maestra di musica di Corsow, Shon Shishi Rodriguez Timmer pa Rufo. Sra. Rodriguez a cuminsa siña Rufo e conocionnan di musica en general. Manera cu Rufo a haya e piano e mes tabata practica ariba dje.

Tempo cu Rufo ta tin apenas 10 aña su tata a fayece



repentinamente y a laga Rufo y su tres otro rumanan huerfano. Su mama Shon Annette, un dama di caracter fuerte y semper cu un conducta corecto a sigui e lucha pa hiba su famia padilanti. Aki el a haya e sosten financiero di su famia.

Tempo cu Rufo ta tin 12 aña ya e por a toca piano na un manera admirable. Tambe el a siña su mes saxofon, guitarra, cuarta, clarinet y otro instrumentonan ritmico.

Tempo cu Rufo ta tin 15 aña el a lanta e orkesta musical "Melody Band" hunto cu su amigonan : Tom Lampe (violin), Wewe Croes (violin), Boysie Lampe (violin), Twai Croes (trompet), Clemente Lacle (drum), y Rufo na piano. Despues tambe a join e grupo Padu Lampe, primo segundo di Rufo, y aki a cuminsa nan amistad.

Nan 1935, inspira door di e famoso compositor y cantante Argentino Carlos Gardel cu a bishita Aruba e aña ei, y cu Rufo a haya un oportunidad pa actua hunto cu ne, Rufo a lanta su grupo di tango "Los Trovadores Tropicales" hunto cu su amigonan Clemente Lacle (cantante) y guitaristanan : Harold Hopmans, Carlos Booi, Jan Croes y Shemmi Coronel. E conunto aki tabata e prome conjunto musical di Aruba cu a toca na un radio na Corsow, radio Curom.

INICIO COMO COMPOSITOR

Aña 1935 tabata un aña di hopi significacion pa historia musical, Rufo a compone na edad di 18 aña, su prome wals "Arubanita" y e composicion aki a cuminsa e era di composicionnan Arubano moderno. E composicion aki a bira asina conoci y gusta cu te awe despues di 80 aña di su composicion e ta sigui ta un di e composicionnan mas toca den historia musical di Aruba. El a wordo toca y graba pa un variedad di artistanan y cu hopi frecuencia por tende na radio y television. E tabata e prome wals, Arubano y Antiyano, cu un miembro di Cas Real, Reina Juliana, a balia riba dje.

E composicion di "Arubanita" tin su significacion historico y cultural pa Aruba, pasobra e ta e prome composicion cu su autor ta conoci y cu te ainda ta wordu graba y toca.

Despues di su prome composicion a sigui un sin fin di composicionnan refina y cu un sabor pikante. Entre otro e famoso wals di tres parti "Encantadora", su segundo wals, e wals complejo "Annette" den tres parti dedica na su mama. E wals "Aruba", bunita y elegante e ta representa e gran dignidad di e pueblo di Aruba. E wals "Antillenhuis" ela dedica na e minister Arubano y su gran amigo Wim F.M. Lampe.

Rufo su amor pa su isla ta obvio ora ripara cuanto biaha el a usa e number Aruba : wals "Arubanita", wals "Aruba", himno "Aruba Dushi Tera", tumba "Aruba tiera bunita", "mambo di Aruba", wals "Mi Aruba Stima".

Tambe tabatin algun composicion cu su gran amigo y colega Padu Lampe :

E tumba "Chanita" cu letra di Hubert Booi, e immortal calypso "Carnaval" di aña 1954 cu a bira famoso cu e cantante Edwin Zichem y naturalmente e himno nacional di Aruba "Aruba Dushi Tera" composita na 1953 y graba pa prome bes den version di orkesta na Venezuela pa e orkesta di Don Anibal Abreu.

UN DON MUSICAL

Compone tabata facil pa Rufo y a sigui un total di mas of menos 400 composicion. Di esaki mas of menos 100 ta composicionnan completo pa piano of orkesta y 300 ta composicionnan y arreglo pa cahi orgel.

Rufo su composicionnan ta inclui : wals, tumba, bolero, zamba, mambo, porro, merengue, danza, mazurka, polka y calypso. Tambe ta di importancia pa menciona cu ademas di compositor, Rufo tabata arreglista y tur e arreglonan e tabata hasi su mes.

Semper Rufo tabatin un of otro melodia den su cabez, pesei tabata wordu exigi di e muchanan di famia pa no hasi ningun ruido, pasobra esaki por causa ca Rufo ta perde e melodia di e composicion cu e tabata bezig cu ne.

Den un entrevista sostene cu Rufo na 1968 ariba e pregunta cu di tur su composicionnan cual ta su favorito, e contesta tabata rapido : e wals "Encantadora".

Na edad di 21 aña Rufo a cuminsa cu e trabou di cahi orgel. Aruba conoce awe na aña 2015 mas of menos 118 aña di musica di cahi orgel na Aruba, pero Rufo tabata e prome persona cu a cuminsa traha e cilindernan pa e cahi orgel na Aruba y el a hasi esaki pa 33 aña. Anteriormente e cilindernan tabata bai Corsow. E hecho aki tambe ta duna Rufo Wever un lugar especial den historia di musica folklorico di Aruba. Pa hopi di e composicionnan cu Rufo a haci pa caha di orgel el a usa e number artistico A. N. Tillano. Den historia di musica di caha di orgel por waak e number aki ta aparece na hopi caminda y hopi hende no sa cu esaki ta Rufo mes.

Na 1941 den un accidente fatal Rufo a perde su braza robez, apesar di e tragedia aki den su bida el a supera esaki y el a keda compone y toca piano cu un braza artificial cu e mes a diseña y cu a wordu traha pe na Alemania. Despues el a haya cu esaki tabata pisa hopi pa e por toca piano cu ne y e mes a traha un na Aruba usando tasnan di cuero di scol cu no tabata wordu usa mas.

Dia 30 di December 1977, apesar cu Rufo su salud a bai atras, toch el a fayece inespera di un pulmonia.

Aruba y Antiyas a perde un di su musiconan di mas grandi, e pionero di e musica y cultura moderno di Aruba.

Awe ta cumpli 38 aña di su fayecimento, pero e herencia cultural cu el a laga atras pa su isla cu tanto el a stima lo keda aki den nos bida y nos alma cada vez cu nos tende e tononan vibrante di su musica.

Aki ta sigui un lista di algun di e composicionnan :

Wals:
Arubanita, Encantadora, Llorando, Mis Penas, Padu Del Caribe, Glenda y Herbert, Flamingo Room, Aruba, Pensando en Ti, Emelina, Dulce, Pensamiento, Preciosa, Bonita, Palomita, Biba pascu, Violeta, Trupial, Chuchubi, Solo solo, Bandlerero, Antillenhuis, Annette, El libertador, Suavidad, Belinda
Tumba: Paraderos, Awa blauw, Tienda nobo, Den steef, Bam zoya, Compa Nanzi, Sucu dushi, Gi-ambo bieuw, Ta m'a bula e waya, Ring ring, Coba poz, Mi oloshi, Mes ora, Pan Cayente, Aruba tiera bunita, Tumba pa gozar, Sabrosita, Calientito, Bitter bai, Pikitin pikitin
Bolero: Te quiero, Algun dia sere feliz, Gracias amigo
Zamba: Boom, boom, boom
Mambo: Mambo de Aruba
Porro: Marinero
Merengue: Nenita bonita, Merengue popular, Wega bala, Galina, Me gusta mas, Pura candel
Mazurka: Revuelta, Alegria, Curacao
Polka: Fiesta, Gasta Dek, Gozando
Calypso: Carnaval (cu Padu Lampe), Pimienta
Danza: Danza Alegre